

四庫全書

經部

欽定四庫全書

春秋究遺卷十二

左庶子葉酉撰

襄公下

十有六年春王正月葬晉悼公

三月公會晉侯宋公衛侯鄭伯曹伯莒子邾子薛伯杞伯小邾子于湫梁

傳會于湫梁以我故執邾宣公莒犁比公且曰通齊

楚之使晉侯與諸侯宴于溫使諸大夫舞曰歌詩必類齊高厚之詩不類荀偃怒且曰諸侯有異志矣使諸大夫盟高厚高厚逃歸杜註不書高厚逃歸故也按高厚本不預會故春秋不書若謂其以逃歸故則如七年鄆之會陳侯亦逃歸矣經何以列于會耶彼其所以不預會者是時晉平公初立不能如悼公之謙以大夫不當與公侯抗故抑高厚而不使之預會也觀其既會而宴第使諸大夫舞以侑觴而不得預

諸侯之宴則齊高厚之不得預諸侯之會審矣惟不得預會且屈在歌舞之列故高厚歌詩遂悍然而故違其令蓋不勝其忿故耳自此至春秋之終惟召陵之會齊國佐在列其餘未有以大夫預者殆皆沿此會以為例歟高厚逃歸不書者外臣逃非陳侯鄭伯比輕其事故畧之然則鄭詹逃何以書以其來魯故戊寅大夫盟

按會盟之見經者多矣從無諸侯會而大夫盟者有

之自湟梁始先儒謂政自大夫出故春秋書此以示
譏其說非也是時晉悼甫薨平公繼立傳稱羊舌肸
為傅云云是所用皆賢猶未改其父之臣也何嘗有
尾大不掉之事致聖人以此遍刺天下之大夫乎彼
其所以諸侯會而大夫盟者晉原使諸大夫盟高厚
高厚大夫也故止使大夫盟之迨高厚逃歸諸大夫
雖自相與盟然因前未及盟至是而乃卒其事故諸
侯仍不預也豈政在大夫之故哉然則聖人于此遂

無譏乎據三年及陳袁僑盟二十七年盟于宋皆主
魯卿書及且大夫皆冠之以諸侯所以然者會盟乃
諸侯之事大夫不過奉其君之命以相與為好非大
夫之自為會盟也故不可單以大夫書此盟叔孫豹
亦在列若春秋果無所譏則當書曰叔孫豹及諸侯
之大夫盟于湓梁矣乃不主叔孫豹書及且單稱大
夫並不冠之以諸侯者蓋晉之伯業衰於晉平故即
位之初甫為此會而諸侯即有異志其時雖尚無尾

大不掉之事然諸侯會而大夫盟自桓文創伯以來
未嘗聞此舉也其後政令日弛馴至公室卑而大夫
擅權所謂倒持太阿授人以柄者其端實由此而啟
故聖經單以大夫盟書並不冠之以諸侯所以特著
其為大夫以正其盟之失也此與莊元年書夫人孫
于齊而不書姜氏其義正同彼義闕乎夫人故去其
姜氏此義闕乎大夫故不冠之以諸侯也既不冠之
以諸侯矣則魯卿亦大夫也故不主叔孫豹書及不

地者說詳僖五年盟于首止下

晉人執莒子邾子以歸

執隣國之諸侯例稱人

齊侯伐我北鄙

夏公至自會

五月甲子地震

叔老會鄭伯晉荀偃衛甯殖宋人伐許

荀偃主兵而先鄭伯者不以臣先君也疏乃引僖公

二十七年書楚人陳侯蔡侯鄭伯許男圍宋以為當
先荀偃之證不知圍宋之役楚子先在後乃去之獨
留子玉於宋若書楚子無以見子玉之獨留矣故不
得不稱楚人所謂楚人者原不專指子玉也大夫不
可先諸侯此自當先鄭伯左傳為夷故也蓋不得其
辭而從為之辭

秋齊侯伐我北鄙圍成

傳孟孺子速微之齊侯曰是好勇去之以為之名速

遂塞海陁而還

大雩

冬叔孫豹如晉

傳穆叔如晉聘且言齊故

十有七年春王二月庚午邾子貜卒

去年晉執以歸此書卒者蓋晉尋釋之不書其歸者邾與魯屢相侵伐又以魯故見執于晉故歸而不告情理之常

宋人伐陳

李氏廉曰傳不見二國致釁之由而陳自逃歸之後
不與于中國之盟會得非以晉命乎

夏衛石買孫師伐曹

傳衛孫蒯田于曹隧飲馬于重丘毀其瓶重丘人詢
之夏衛石買孫蒯伐曹取重丘曹人懇于晉杜註孫
蒯不書非卿接取重丘不書不以告也

秋齊侯伐我北鄙圍桃

齊高厚帥師伐我北鄙圍防

傳齊人以其未得志于我故伐我北鄙圍桃高厚圍
臧紇于防師自陽關逆臧孫鄒叔紇臧疇臧賈帥甲
三百宵犯齊師送之而復齊師去之

九月大雩

宋華臣出奔陳

傳宋華閱卒華臣弱臯比之室使賊殺其宰吳宋公
欲逐之左師曰臣亦卿也大臣不順國之恥也不如

蓋之乃舍之十一月甲午國人逐瘕狗瘕狗入于華
臣氏國人從之華臣懼遂奔陳

冬邾人伐我南鄙

傳為齊故也

十有八年春白狄來

杜註不言朝不能行朝禮

夏晉人執衛行人石買

傳晉人執衛行人石買于長子執孫蒯于純留為曹

故也按石買本有當執之罪而書行人則杜氏非使
人之罪其說不足據執孫蒯不書非卿故

秋齊師伐我北鄙

冬十月公會晉侯宋公衛侯鄭伯曹伯莒子邾子滕子
薛伯杞伯小邾子同圍齊

傳會于魯濟尋淖梁之言同伐齊齊侯禦諸平陰丙
寅晦齊師夜遁十一月丁卯朔入平陰遂從齊師十
二月戊戌門于雍門己亥諸侯之師焚申池之竹木

卷十二
按圍書同通春秋惟此一見蓋春秋時侵伐皆主兵
之國接戰餘不過為之聲勢而已獨此年圍齊則諸
侯之師皆用命故書同與僖三十三年晉人及羗戎
敗秦師于殽書及同義

曹伯負芻卒于師

楚公子午帥師伐鄭

傳鄭子孔欲去諸大夫將叛晉而起楚師以去之使
告子庚子庚不許楚子聞之使告子庚曰國人謂不

穀主社稷而不出師死不從禮大夫圖之子庚歎曰
君王其以午懷安乎臣請嘗之若可君繼之不可收
師而退子庚帥師治兵于汾于是子矯伯有子張從
鄭伯伐齊子孔子展子西守二子知子孔之謀完守
入保子孔不敢會楚師楚師伐鄭子庚門于純門信
于城下而還甚雨楚師多凍役徒幾盡

十有九年春王正月諸侯盟于祝柯

祝柯澶淵之盟不書同蓋席悼公之盛侈然而以盟

主自居也會有王臣而盟無王臣則再舉諸侯會本無王臣而盟再舉諸侯者以中有間事故

晉人執邾子

公至自伐齊

圍齊而以伐致者公出時原以伐齊告廟故也僖二十八年圍許則公出時只以會溫告未嘗以伐許告故據其實而以圍許致

取邾田自鄆水

傳諸侯還自沂上盟于督揚曰大母侵小執邾悼公
以其伐我故遂次于泗水取邾田自鄆水歸之于我
杜註督揚即祝柯按邾田謂邾之田必非魯之舊疆
可知

季孫宿如晉

拜師也

葬曹成公

夏衛孫林父帥師伐齊

傳晉欒魴帥師從衛孫文子伐齊杜註兵并林父不
別告也望溪先生曰衍奔在齊而林父以大師伐之
其惡極矣使並書而先晉則疑林父受命于晉而賊
君之志隱矣按聖人因史作經凡侵伐列序諸國皆
魯史舊文此經之所以不列晉者以欒魴非卿晉不
以告故耳與成六年傳稱晉伯宗夏陽說衛孫良夫
甯相鄭人伊雒之戎陸渾蠻氏侵宋而經止書衛孫
良夫侵宋並不序晉其義正同

秋七月辛卯齊侯環卒

晉士匄帥師侵齊至穀聞齊侯卒乃還

公羊傳還者何善辭也大其不伐喪也

八月丙辰仲孫蔑卒

齊殺其大夫高厚

齊靈公既立光以為太子又以戎子嬖欲立其子牙
遂東太子光而使高厚傅牙以為太子夙沙衛為少
傅靈公疾崔杼逆光而立之遂殺戎子尸諸朝而執

公子牙于句瀆之丘秋八月齊崔杼殺高厚于灑藍而兼其室稱國殺者以莊公之命來告也

鄭殺其大夫公子嘉

傳鄭子孔之為政也專國人患之乃討西宮之難與純門之師子孔當罪以其甲及子革子良氏之甲守甲辰子展子西率國人伐之殺子孔而分其室按子展子西率國人伐之殺子孔而書國殺者以鄭伯之命來告故

冬葬齊靈公

城西郭

傳懼齊也

叔孫豹會晉士匄于柯

傳齊及晉平盟于大隧故穆叔會范宣子于柯杜註
齊晉平魯懼齊故為柯之會以自固

城武城

懼齊也

二十年春王正月辛亥仲孫速會莒人盟于向

杜註莒數伐魯諸侯盟督揚以和鮮之故二國自復
共盟結其好

夏六月庚申公會晉侯齊侯宋公衛侯鄭伯曹伯莒子
邾子滕子薛伯杞伯小邾子盟于澶淵

傳盟于澶淵齊成故也

秋公至自會

仲孫速帥師伐邾

傳邾人驟至以諸侯之事弗能報也秋孟莊子伐邾以報之按祝柯之盟既執邾子且取其田矣尚云弗能報乎蓋魯人藉口以為兵端左氏誤信焉而弗之察也

蔡殺其大夫公子燹蔡公子履出奔楚

傳蔡公子燹欲以蔡之晉蔡人殺之公子履其母弟也故出奔楚

陳侯之弟黃出奔楚

傳陳慶虎慶寅畏公子黃之偪愬諸楚曰與蔡司馬
同謀楚人以為討公子黃出奔楚按黃與變皆不欲
事楚者而履與黃不容于其國其出奔也乃不于晉
而于楚高氏以為自理蓋履必歸罪于其兄而黃則
白二慶之讒也

叔老如齊

齊魯搆怨朝聘禮絕今始復通

冬十月丙辰朔日有食之

季孫宿如宋

報向戌之聘也

二十有一年春王正月公如晉

傅拜師及取邾田也

邾庶其以漆閭丘來奔

傅庶其非卿也以地來雖賤必書重地也果如其說則二十三年邾畀我來奔昭二十七年邾快來聘皆不以地何以亦書乎蓋左氏所謂非卿者小國之卿

非大國之卿比即公羊所謂莒無大夫也故會伐會盟皆不名然亦未始非卿也卿來奔必書史之常文又按公去年夏與邾同盟而秋伐邾今又納其叛人信義安在而澶淵之盟仍書公則知幽之盟之不書公說者謂叛盟故必不然矣此亦其一證

夏公至自晉

秋晉欒盈出奔楚

傳欒桓子娶于范宣子生懷子桓子死欒祈與其老

州賓通懷子患之祈懼其討也愬諸宣子曰盈將為
亂宣子信之懷子為下卿宣子使城著而遂逐之

九月庚戌朔日有食之

冬十月庚辰朔日有食之

戴氏震曰日月之行終古不變凡日食後越五月六
月可再食無比月頻食之理襄此年己酉推九月定
朔庚戌日申時合朔入食限十月庚辰朔不入食限
二十四年壬子七月甲子朔入食限八月癸巳不入

食限先儒蔡氏曰想因當時史官算失一閏誤以二十一年之九月作十月朔日食二十四年七月作八月朔日食已書之史既而見其失閏不合也乃於兩年各補足一閏書為九月朔日食七月朔日食兩冊俱存而後之修史者并錄之也按比月頻食漢初綱目兩書之豈皆誤耶存考

曹伯來朝

公會晉侯齊侯宋公衛侯鄭伯曹伯莒子邾子於商任

傳錮欒氏也

二十有二年春王正月公至自會

夏四月

秋七月辛酉叔老卒

冬公會晉侯齊侯宋公衛侯鄭伯曹伯莒子邾子薛伯
杞伯小邾子于沙隨

傳復錮欒氏也

公至自會

楚殺其大夫公子追舒

公子而不為大夫者即不稱公子既稱公子矣則其為大夫可知乃必以大夫書者公子親屬而其為國體之所係者大夫也文自不得從省

二十有三年春王二月癸酉朔日有食之

三月己巳杞伯句卒

夏邾界我來奔

界我庶其之黨來奔故書

葬杞孝公

陳殺其大夫慶虎及慶寅陳侯之弟黃自楚歸于陳
傳陳侯如楚公子黃愬二慶于楚楚人召之慶氏以
陳叛夏屈建從陳侯圍陳遂殺慶虎慶寅楚人納公
子黃按不書楚納者陳侯亦知其無罪非內不受者
比故以自歸為文

晉欒盈復入于晉入于曲沃

傳晉將嫁女于吳齊侯使析歸父媵之以潘載欒盈

及其士納諸曲沃四月欒盈帥曲沃之甲因魏獻子以畫入絳范宣子奉公以如固宮范氏之徒在臺後欒氏乘公門范鞅用劍以帥卒欒氏退欒盈奔曲沃晉人圍之按先書入晉者當盈入絳之時晉人不知其先入曲沃也及敗奔曲沃乃以其狀告故先書復入于晉後書入于曲沃不書叛者藉齊之力而求入則未入之先早已有無君之心矣未入而有無君之心是叛在入先不待入而後書叛也叛在入先又入

而欲為亂于國罪有重科故曰復與宋魚石復入于彭城其義正同不書自齊者以潛入故

秋齊侯伐衛遂伐晉

遂者繼事之詞而有歸重之意齊納欒盈不遂利晉之難而伐之其意不在衛也

八月叔孫豹帥師救晉次于雍榆

以救晉出師而盤桓于雍榆畏齊而不敢進也

己卯仲孫蔑卒

冬十月乙亥臧孫紇出奔邾

季武子無適子公鉏長而愛悼子訪諸臧紇紇請立之故公鉏怨臧氏孟莊子卒公鉏為立其庶子羯使讐臧氏遂誣告季孫曰臧氏將為亂季孫怒命攻臧氏乙亥臧紇斬鹿門之闕以出奔邾

晉人殺欒盈

殺大夫不去其官不以賢愚異惟欒盈及鄭良霄不書大夫者以奔而位絕也殺稱人者既不書大夫矣

則于國體無所傷故不稱國殺而兩下相殺不志于
春秋例不當目其人也以其用大衆攻而殺之故稱
人殺文當然耳先儒或謂同于討賊之辭以為盈與
霄使得所欲勢必至于弑君其說恐不確盈與霄使
得所欲不過逐范氏公孫黑而專其國政耳春秋時
世卿相仇殺如此類者多矣安得便蔽以弑君之罪
哉

齊侯襲莒

傳齊侯還自晉不入遂襲莒門于且于傷股而退明日將復戰杞殖華還先遇莒子于蒲侯氏莒子親鼓之獲杞殖莒人行成按春秋書襲惟此一見

二十有四年春叔孫豹如晉

仲孫羯帥師侵齊

傳晉故也

夏楚子伐吳

傳楚子為舟師以伐吳不為軍政無功而還

秋七月甲子朔日有食之既

齊崔杼帥師伐莒

傳齊侯既伐晉而懼將欲見楚子楚子使蘧啟疆如齊聘且請期秋齊侯聞將有晉師使陳無宇從啟疆如楚乞師崔杼帥師送之遂伐莒侵介根

大水

八月癸巳朔日有食之

公會晉侯宋公衛侯鄭伯曹伯莒子邾子滕子薛伯杞

伯小邾子于夷儀

傳將以伐齊水不克按晉是時國勢不競其會而不伐者蓋有所畏耳曰水不克者乃其掩飾之詞

冬楚子蔡侯陳侯許男伐鄭

楚伐鄭以救齊不書救齊者必鄭以伐告諸侯救鄭不書者不成乎救也

公至自會

陳鍼宜咎出奔楚

傳陳人復討慶氏之黨鍼宜咎出奔楚

叔孫豹如京師

傳齊人城邾穆叔如周聘且賀城杜註洛穀闕毀王
宮齊叛晉欲求媚於王故為王城之按魯自宣七年
蔑如京師後不聘王者四十餘年矣至是而豹如京
師者蓋因齊為王城邾故設假王寵以釋齊怨也

大饑

二十五年春齊崔杼帥師伐我北鄙

傳以報孝伯之役也孝伯即仲孫羯

夏五月乙亥齊崔杼弑其君光

傳齊棠公之妻東郭偃之姊也偃臣崔武子棠公死
偃御武子以弔焉見棠姜而美之遂取之莊公通焉
驟如崔氏以崔子之冠賜人崔子因是欲弑公夏五
月莒子朝于齊甲戌饗諸北郭崔子稱疾不視事乙
亥公問崔子遂從姜氏姜入于室與崔子自側戶出
甲與公踰墻射之中股反墜遂弑之

公會晉侯宋公衛侯鄭伯曹伯莒子邾子滕子薛伯杞伯小邾子于夷儀

傳會于夷儀以報朝歌之役齊人以莊公說使隰鉏請成慶封如師晉侯許之望溪先生曰受賂不討齊亂而諸侯列序觀此則知盟扈會扈諸侯不序先儒以為不能討賊故畧之失其義矣

六月壬子鄭公孫舍之帥師入陳

傳初陳侯會楚子伐鄭當陳隧者井堙木刊鄭人怨

之六月鄭子展子產帥車七百乘伐陳宵突陳城遂入之

秋八月己巳諸侯同盟于重丘

復書同盟者有欒盈之亂以盟主而見伐于齊其勢幾于不振故復修同盟之禮不敢以主盟自居也諸侯即會于夷儀之諸侯前目故後凡杜註伐齊而書同盟以明齊亦同盟按九年同盟于戲十一年同盟于亳城北杜註皆云伐鄭而書同盟則鄭受盟可知

與此註齊亦同盟同其說恐不確凡春秋書同盟皆伯主嫌于專主其事故謙言已與諸侯同為此盟焉耳非謂與所伐之國同盟也況此經統言諸侯前目故後凡前目之所無者後凡安得而有之故所為諸侯者單指在會之諸侯而言齊原不在所同之內其預盟固可書同盟即不預盟亦可書同盟也若如杜註云伐齊而書同盟以明齊亦同盟則如柯陵之盟鄭實不服何亦以同盟書乎彼其所以但書同盟不

問所伐之國與盟不與盟而為是一施之辭者春秋因史作經凡事之首尾不必備伐國而同盟宜書至所伐之國或服而與盟或不服而不與盟皆戰事之首尾耳固春秋之所不必備其辭者也如晉楚爭鄭而鄭及晉楚平皆不書即此義重丘之盟據陳文子重丘之盟未可忘語齊之預盟不待言而春秋不書者以例本不應書也例本不應書則其書諸侯同盟齊必不在所同之內又何疑乎杜註既不得其解而

從為之辭而劉氏炫又以齊不與盟屑屑焉而與之
爭所為齊固失之而楚亦未為得也

公至自會

衛侯入于夷儀

夷儀非國都也故書入未返國故不名鄭伯突入于
櫟稱名者以返國不書故

楚屈建帥師滅舒鳩

吳以舟師之役召舒鳩人舒鳩人叛楚楚子師于荒

蒲使讓之舒鳩請受盟楚師還二十五年舒鳩人卒
叛楚楚令尹子木伐之及離城吳人救之簡師會之
吳師大敗遂圍舒鳩舒鳩潰遂滅之

冬鄭公孫夏帥師伐陳

傳鄭復伐陳及鄭平

十有二月吳子遏伐楚門于巢卒

傳吳子諸樊伐楚以報舟師之役門于巢巢牛臣隱
于垣垣以射之卒按吳子伐楚不應名名以卒故

二十有六年春王二月辛卯衛甯喜弑其君剽

傳衛獻公自夷儀使與甯喜言甯喜曰必子鮮在二十六年公使子鮮為復辭敬妣強命之對曰君無信臣懼不免敬妣曰雖然以吾故也子鮮不獲命于敬妣以公命與甯喜言曰苟反政由甯氏祭則寡人二月庚寅甯喜右宰穀攻孫氏不克伯國傷孫氏夜哭甯子復攻孫氏克之辛卯殺子叔及太子角杜註子叔衛侯剽言子叔剽無諡也按剽篡立而以弑其君

書者與文十八年書齊人弑其君商人義同

衛孫林父入于戚以叛

入者由外而內之辭大夫而據其私邑以叛則又以其國都為外而以其私邑為內矣故曰入

甲午衛侯衎復歸于衛

諸侯返國必書名更始之義也說詳僖三十年衛侯鄭歸于衛下

夏晉侯使荀吳來聘

傳晉人為孫氏故召諸侯將以討衛也夏中行穆子來聘召公也

公會晉人鄭良霄宋人曹人于澶淵

公與外大夫會盟例不書公以其降等屈班諱之也此不諱者魯至成襄以後祿去公室凡侵伐會盟之事皆三桓主之雖公親在行止供大夫之役耳非公之自為降等屈班也故不諱與蜀之盟不諱公其義同晉宋稱人必非卿使宋果向戌肯居鄭下哉左傳

尊公與後之說不足信鄭良霄以名見則外大夫與公會無貶而稱人之例審矣然則邢丘之會何以卿皆稱人蓋晉侯之降等屈班必入諸侯之大夫而其失始見也

秋宋公殺其世子痤

宋世子痤美而狠合左師畏而惡之寺人惠牆伊戾為太子內師而無寵讒太子將為亂公囚太子乃縊而死殺太子目君甚之也

晉人執衛甯喜

傳公會晉趙武宋向戌鄭良霄曹人于澶淵以討衛疆戚田取衛西鄙懿氏六十以與孫氏於是衛侯會之晉人執衛甯喜北宮遺使女齊以先歸衛侯如晉晉人執而囚之於士弱氏按執衛侯不書不以告也八月壬午許男甯卒于楚

傳許靈公如楚請伐鄭曰師不興孤不歸矣八月卒于楚楚子曰不伐鄭何以求諸侯十月楚子伐鄭

冬楚子蔡侯陳侯伐鄭

葬許靈公

二十有七年春齊侯使慶封來聘

夏叔孫豹會晉趙武楚屈建蔡公孫歸生衛石惡陳孔
奭鄭良霄許人曹人于宋

傳宋向戌善于趙文子又善于令尹子木欲弭諸侯
之兵以為名如晉告趙孟許之如楚楚亦許之告齊
秦亦許之皆告于小國為會于宋杜註按傳會者十

四國齊秦不交相見邾滕為私屬皆不與盟宋為主
人地于宋則與盟可知故經惟序九國大夫楚先晉
歃而書先晉貴信也陳于晉會常在衛上孔奐非上
卿故在石惡下按楚先晉歃乃盟也此書會故先晉
會之所以先晉者蓋屈建欲盟先晉歃故于會特推
趙武以晉楚狎主夏盟會既先晉則盟自應先楚持
此為詞度趙武無以難之故會先晉者乃楚人之狡
謀非聖人之貴信也聖人因史作經凡會盟列序皆

魯史舊文故當時載書所次多與周班不合者聖人
皆仍之而無所改正乃于此而獨以貴信先晉也理
不宜然又據傳稱宋公蕞享晉楚之大夫趙孟為客
使非會已先晉宋為地主安敢蔑視楚卿而遽尊趙
孟且子木亦安能無言乎地于宋即不序宋者晉自
文公後主盟中夏者近百年當時諸侯雖亦往往從
楚然終惴惴焉惟晉之討是懼迨宋向戌欲弭兵而
為此會于是楚以僭王之國竟公然與晉並列一時

兩伯而不復有所軒輊此非天下之小故也聖人安
得不變文以見義乎故列序諸國獨沒宋不書蓋專
以合晉楚之成致楚氛益熾為宋向戌罪若列序諸
國仍書宋向戌于晉楚大夫之後則為會盟之常詞
而習其讀者弗之察矣惟沒宋不書使不與蔡衛陳
鄭諸國相混第直書其會所之在宋而歸咎向戌之
意以語氣求之自隱然見于言外此聖人之文所為
游夏不能贊一辭者歟杜註非是其辨更詳具傳十

九年盟于齊下

衛殺其大夫甯喜

患其專而殺之不以其罪也故從殺大夫之恒辭

衛侯之弟鱄出奔晉

衛侯既殺甯喜鱄病失言故出奔稱衛侯之弟者恒辭也先儒以為罪衛侯誤矣衛侯病在食言耳非不友于其弟也鱄稱弟不足以罪之

秋七月辛巳豹及諸侯之大夫盟于宋

豹去氏者承上文從省大夫而係于諸侯義具三年及陳袁僑盟下凡公與外諸侯會盟皆前日後凡不覆書公及以魯君例魯卿則此亦止應書諸侯之大夫盟于宋而獨覆書豹及者會先晉而盟先楚與尋常會盟皆以晉為主者不同故覆書豹及使若為異事者然此與定四年臯鼫之盟覆書公及其義正同再書于宋者會盟不同日例應再書其地也

冬十有二月乙亥朔日有食之

二十有八年春無冰

夏衛石惡出奔晉

衛人討甯氏之黨故也

邾子來朝

傳時事也

秋八月大雩

仲孫羯如晉

傳告將為宋之盟故如楚也

冬齊慶封來奔

慶封好田而嗜酒與慶舍政盧蒲癸王何二人皆嬖
于慶舍十一月乙亥嘗于太公之廟癸何殺慶舍慶
封來奔

十有一月公如楚

傳為宋之盟故公及宋公陳侯鄭伯許男如楚及漢
楚康王卒公欲反叔仲昭伯曰我楚國之為非為一
人行也公遂行

十有二月甲寅天王崩

傳癸巳天王崩王人來告喪問崩日以甲寅告故書之以徵過也按告喪赴文後必具日月其所具之日即崩之日此定例也魯不應有是問使者承命出使非甚愚之人必無誤告天王崩日之理其所以魯為是問而使者告稱甲寅者是時周室衰微物力匱絀喪事不能如禮故天王以癸巳日崩直遲二十餘日至甲寅始告其當國大臣亦自知緩告之非禮故赴

文後所具之日即用遣使之日魯與周相去非絕遠
天王之崩聞諸道路者已有日矣今見其以甲寅赴
故疑而問之使者不欲顯其緩告之失故堅稱甲寅
非實不知天王之以癸巳崩而謾以甲寅告也魯史
從告聖人亦仍之而已

乙未楚子昭卒

胡氏安國曰甲寅天王崩乙未楚子昭卒相距四十
二日則閏月之驗也然不以閏書見喪服之不數閏

也按閏承前月而受其餘日故閏月之日繫于前月之下而不以閏書者乃史文定例胡氏以為見喪服之不數閏聖經恐無此義

二十有九年春王正月公在楚

莊文成襄四公正月在晉者六皆不書而在楚則書者以僭王故惡楚也傳楚人使公親禭夏四月葬楚康王公及陳侯鄭伯許男送至西門之外楚不書葬所謂避其號而不書者也

夏五月公至自楚

傳公還及方城季武子取卞使公治問璽書追而與之曰聞守卞者將叛臣帥師徒以討之既得之矣敢告公治致使而退及舍而後聞取卞公欲無入榮成伯賦式微乃歸接卞乃魯邑而不屬季氏取之以自益故公聞之而欲無入也

庚午衛侯衍卒

閻弑吳子餘祭

傳吳人伐楚獲俘焉以為閭使守舟吳子餘祭觀舟
閭以刀殺之不曰其君賤閭也雖賤之而閭亦食祿
故書弑

仲孫羯會晉荀盈齊高止宋華定衛世叔儀鄭公孫段
曹人莒人邾人滕人薛人小邾人城杞

晉平公杞出也故合諸侯之大夫以城杞

晉侯使士鞅來聘

傳拜城杞也

杞子來盟

諸侯既城杞晉侯使魯歸所侵杞田故杞子來盟杞稱子者義詳僖二十三年杞子卒下

吳子使札來聘

按上書閻弑吳子餘祭此所謂吳子者夷末也杜註餘祭既遣聘而後死札以六月到魯未聞喪也正義隱三年武氏子來求賻文九年毛伯來求金並不言王使傳皆云王未葬是知先君未葬嗣子不得命臣

故杜註以為通嗣君通餘祭嗣也不知先君未葬嗣子不得命臣此周禮也吳本文身斷髮之俗豈可以
是責之毛伯武氏子之來以王在諒闇不稱王命故
不書王使此不用周禮稱吳子命故書吳子使皆魯
史舊文聖人不得而易之也且必無餘祭立已四年
而始通之理至以季子在喪而行吉禮為疑則又有
說春秋時三年之喪雖未盡廢然每遇朝聘會盟燕
享之事葬後輒以吉服成禮觀襄十六年傳稱晉平

公改服修官昭十二年傳稱子產相鄭伯辭于享請
免喪而後聽命是時鄭簡公卒尚未葬故以免喪為
請子產且然則既葬即吉固當時諸侯之通禮也審
矣而葬期又不盡用五月之制晉悼公卒于襄十五
年十一月至十六年正月而葬鄭簡公卒于昭十二
年三月至五月而葬其葬期皆僅及三月是其例也
季子至魯大都在七月內外計此時餘祭之弒已及
三月其葬當已屆期既葬即吉子產既可以免喪而

聽晉命矣季子獨不可以免喪而行聘禮乎且季子
吳之至親雖受命出聘或請俟先君葬畢然後就道
以情理度之尤屬事所宜有果爾則其至魯之日免
喪已久諸行吉禮更可無嫌故賈逵服虔皆以為夷
末新即位使來通聘其說甚確杜註不可從稱札者
來聘例書名胡氏謂譏其讓國非也讓國事在後未
有因其後事而貶之于前者其不從齊年鄭語之例
稱弟又不稱公子者吳在禹貢要荒之地春秋弟以

號舉其世系行次聖人以為不足詳也吳子稱爵與
使椒來聘稱楚子義同詳具莊二十三年荆人來聘
下

秋九月葬衛獻公

齊高止出奔北燕

按左傳齊公孫蠆公孫竈放其大夫高止于北燕而
經以出奔書左氏以為罪高止杜註實放書奔所以
示罪其意以出奔較甚于放故云示罪不知放者以

其罪而放之奔則不必皆有罪也且放必限之以其地奔則任其所如往若以所稱為優劣則奔優于放安有以書奔為示罪者乎高止之所以書出奔者放者上施于下之詞高止為二公孫迫逐而去本不可謂之放故以出奔書此聖人正名分之一端也

冬仲孫羯如晉

報范叔也

三十年春王正月楚子使薳罷來聘

夏四月蔡世子般弑其君固

傳蔡景侯為太子般娶于楚通焉太子弑景侯

五月甲午宋災宋伯姬卒

穀梁傳取卒之日加之災上者見以災卒也伯姬之舍失火左右曰夫人少避火乎曰婦人之義傳姆不在宵不下堂遂逮乎火而死婦人以貞為行者也伯姬之婦道盡矣詳其事賢伯姬也

天王殺其弟佞夫王子瑕奔晉

傳靈王崩僖括欲立王子佞夫佞夫不知戊子僖括
圍為逐成愆五月癸巳尹言多劉毅單蔑甘過鞏成
殺佞夫括瑕廖奔晉書曰天王殺其弟佞夫罪在王
也杜註括廖不書賤也按天王之殺大夫無見經者
先儒謂義得專殺非也設殺之而不當亦以為天子
義得專殺可以削而不載乎蓋天王殺其大夫目天
王不可又不可云周殺其大夫也春秋魯史于王朝
事不必備窮于辭故不書耳若無罪而殺世子兄弟

例應目君故天王之殺其弟必書王子瑕奔晉不言
出者蓋瑕與括廖同謀當括圍蒍之時瑕廖亦當在
軍及佞夫被殺三人遂自軍奔晉望溪先生所謂在
外而奔者是也在外故不書出

秋七月叔弓如宋葬宋共姬

鄭良霄出奔許自許入于鄭鄭人殺良霄

二十九年伯有使公孫黑如楚辭曰楚鄭方惡而使
余往是殺余也伯有將強使之子皙怒將伐伯有氏

大夫和之三十年秋又將使子皙如楚庚子子皙以駟氏之甲伐而焚之伯有奔許乙巳鄭伯及其大夫盟于大宮盟國人于師之梁之外伯有聞鄭人之盟已也怒癸丑晨自墓門之瀆入因馬師頡介于襄庫以伐舊北門駟帶率國人以伐之伯有死于羊肆按宋華元出奔晉自晉歸于宋覆舉宋華元此不覆舉鄭良霄者義見宋華元出奔晉下入而介于襄庫攻舊北門正左氏所謂以惡矣故不曰歸而曰入其不

書叛者叛必有所據之地未有入國都以叛者良霄
乃一狂惑嗜酒之人醉夢之中毫無成算其冒冒焉
旋出旋入不啻自投于罟獲陷井之中適足以殺其
軀而已矣不可以叛言也故不書叛位已絕故不書
大夫稱人以殺與晉人殺欒盈義同

冬十月葬蔡景公

按春秋君弑不書葬先儒以為賊不討故果如此說
則蔡景公何以書葬乎春秋大復仇葬者臣子之終

事苟君父之仇一日未復即臣子之事一日未終故
不書葬所以示臣子以不共戴天之義也豈賊不討
之故乎知春秋所以不書葬之故則蔡景公之所以
書葬者可知矣蓋戕害吾君之人以天下萬世之公
義言之則謂之賊以忠臣孝子一人之私憤言之則
謂之仇如齊無知鄭歸生之屬賊也即仇也有仇而
不可謂之賊者如魯桓之見戕于齊襄是也有賊而
不可謂之仇者如蔡景之見殺于蔡般是也蓋般乃

世子也以世子而忍動于惡則所謂仇者即當為君
父復仇之人梟獍出自宮闈臣民更復何望此時即
有方伯連帥能伸天下萬世之公義者聲罪致討汙
其宮而瀦其室然謂之討罪則可謂之復仇則不可
蓋復仇者創巨痛深人子之所自致討罪者亂臣賊
子王法之所必誅也若以賊不討不書葬是大司馬
九伐之法止欲安死者之體魄而已有是理乎故春
秋仇未復則以不書葬示微見未能堪仇人之胸即

不啻暴吾親之骨而與古者未葬不除服之制皆動
以人心之所甚惻所以徹其臣子者至矣賊未討則
又以書葬示儆見以覆載所不容之人竟得假窀穸
為自掩之計而四鄰諸侯胥若弗聞也者且為會其
葬而莫之詰其所以徹方伯連帥者亦至矣非聖人
孰能修之

晉人齊人宋人衛人鄭人曹人莒人邾人滕人薛人杞
人小邾人會于澶淵宋災故

會非卿故稱人先儒以為貶非也蓋為宋災而謀歸其財其事至細故不使卿春秋據其實而人之何貶之有會未有言其所為者此言其所為公羊云錄伯姬也蓋國有火災其君夫人至以傳姆不在不下堂而死有人心者之所共惻也死者不可復生不得已而謀歸其財此即周禮致禴補歲之義不可謂非諸侯之善舉而亦伯姬之賢有以感之此春秋所以必書其所為歟胡氏以文與葬蔡景公連謂聖人譏其

不討蔡亂而謀宋災其說非是三十二年冬莒人弑
其君密州次年春會于號尋宋盟而不討莒亂春秋
未嘗書其所為也何獨于此而譏其不知類乎魯大
夫不書者共姬魯女既使卿會葬必有獨致其厚者
故不與會左氏以為諱亦非

三十有一年春王正月

夏六月辛巳公薨于楚宮

按傳稱公作楚宮不書者春秋雖重用民力而公宮

之作例不見經以人君寢處之所非臺榭比也不獨
楚宮之不書作而已于此見聖人用法之恕

秋九月癸巳子野卒

傳立胡女敬歸之子子野次于季氏秋九月癸巳卒
毀也

己亥仲孫羯卒

冬十月滕子來會葬

諸侯始親來會葬按外諸侯卒魯遣使往葬不書會

而此書會者春秋書內事不可據來者為文書滕子來葬我君襄公也又不可單書一葬字故書會葬文當然爾

癸酉葬我君襄公

十有一月莒人弑其君密州

傳莒犁比公生去疾及展與既立展與又廢之犁比公虐國人患之展與因國人以攻莒子弑之乃立去疾奔齊陸氏淳曰據傳則展與弑其父不當不書胡

氏安國曰傳有乖謬信經而廢傳可也若密州之事
是矣按文公十八年莒弑其君庶其傳稱莒紀公生
太子僕又生季陀愛季陀而黜僕且多行無禮于國
僕因國人以弑紀公與此疑是一事傳聞兩屬左氏
遂兩載之耳不然前後不應如此相類也以情理度
之弑父當是莒僕之事故既弑之後即以其寶玉來
奔蓋弑逆之賊不能自定其位故也展與之非弑自
當以經文為斷無疑

春秋究遺卷十二

欽定四庫全書

經部

春秋究遺卷十四

詳校官監察御史_臣王爾烈

給事中_臣溫常綬覆勘

總校官庶吉士_臣何思鈞

校對官監丞_臣張曾炳

謄錄監生_臣沈成均

欽定四庫全書

春秋究遺卷十三

左庶子葉酉撰

昭公上

元年春王正月公即位

按子野之卒先儒謂季氏陰弑而以毀告果如其說則昭公不當書即位矣季氏雖不臣然非若慶父之意在得國與仲遂之意在立庶也昭公與子野皆裏

公子昭是時又年已十九彼何所利于昭公之立而為此大不韙之事哉

叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢

傳尋宋之盟也楚令尹圍請用牲讀舊書加于牲上而已杜註楚恐晉先歆故欲從舊書不歆血經所以不書盟按陳招稱公子以其為大夫也諸侯之兄弟見經者十而傳獨于招稱司徒則其為大夫審矣為

大夫故稱公子義具隱四年翬帥師下不歆血不成乎其盟也故不書盟

三月取鄆

凡取邑必先書伐某國此不先書伐莒者鄆乃魯之舊疆若先書伐莒則似取莒之邑矣襄公十二年季孫救台遂入鄆不言伐莒亦此意也

夏秦伯之弟鍼出奔晉

傳秦后子有寵于桓如二君于景其母曰弗去懼選

癸丑鉞適晉其車千乘

六月丁巳邾子華卒

晉荀吳帥師敗狄于大鹵

傳晉中行穆子敗無終及群狄于太原崇卒也將戰
魏舒曰彼徒我車所遇又阨請皆卒自我始乃毀軍
以為行翟人笑之未陣而薄之大敗之

秋莒去疾自齊入于莒

傳莒展輿立而奪羣公子秩公子召去疾秋齊公子

鉏納去疾按公子返國或書自或不書自其不書自者以其于外諸侯無所藉力如齊小白陽生是也其書自者以諸侯納之傳所謂外有奉是也莒去疾以齊公子鉏帥師納之故書自齊入于莒然桓十一年突歸于鄭莊二十四年赤歸于曹傳稱宋人執鄭祭仲戎侵曹則其藉力于宋與戎審矣而不書自者何蓋文有所承不必書也然突與赤皆文有所承此獨無所承者何突與赤之歸寔宋與戎主之去疾則莒

公子召之齊特使公子鉏帥師以送之耳其事異故
文不得不異也去疾以名係國正也傳稱犁比公生
去疾及展輿則去疾長子當立可知與齊小白陽生
繫國義同

莒展輿出奔吳

展輿係國先儒以為罪諸侯之與其立非也凡入國
必當立者乃係國不當立者即不係國以國本非其
所有也若出奔則未有不係國者蓋雖不當立而既

有其國矣安得不以實書乎不書爵說詳桓十一年
鄭忽出奔衛下

叔弓帥師疆鄆田

傳因莒亂也

葬邾悼公

冬十有一月巳酉楚子麋卒

按傳楚令尹圍將聘于鄭未出竟聞王疾而還繼而
殺之並殺其二子而經以卒書先儒紛紛異論至以

不書弑為聖人制人欲而存天理迂誕至此大抵皆為傳所誤而不援經以為斷耳春秋傳信之書使麋果弑經必不書卒經既以卒書則麋必非弑而傳所以為是說者蓋當麋卒時其子尚幼圍大權在握因殺其孤而篡其位而其後又窮凶極惡身犯衆怒下流之人衆毀所歸故並加以弑麋之罪左氏遂從而信之而不知其實不然也凡弑逆之賊未有不自諱其事而惟恐人之揭之者乃楚靈于慶封蔡般之弑

其君也皆聲罪致討其不以弑君之事為諱者彼固自以為無是事耳迨慶封不肯從戮然後知己固被此惡名而惟恐其聞于諸侯也使速殺之而其于蔡侯般直殺之而不以狗矣使當日果出于弑吾知其並慶封亦不待其不肯從戮也早殺之而不以狗矣然則楚麋之非弑所當信經而廢傳也奚疑

楚公子比出奔晉

凡國有弑逆之事則大夫出奔不書蓋春秋舉重重

莫重于弑君一大夫之出奔猶世變之小者耳輕其

事故畧之如魯季友之奔陳齊糾之奔魯皆不書是

其例也

其他如哀三年書桓宮僖宮災而傳記司鐸火經文不書即此義

此既書楚

公子比出奔晉則楚子麇之是卒而非弑也蓋信

二年春晉侯使韓起來聘

杜註公即位故

夏叔弓如晉

傳報宣子也

秋鄭殺其大夫公孫黑

鄭公孫黑好在上攻良霄而逐之又與公孫楚爭
室將作亂欲去游氏而代其位駟氏與諸大夫欲殺
之子產在鄙聞之乘遽而至使吏數之黑遂縊尸諸
周氏之衢

冬公如晉至河乃復季孫宿如晉

傳晉少姜卒公如晉及河晉侯使士文伯來辭曰非
伉儷也請君無辱公還季孫宿遂致服焉杜註致少

姜之褻服按齊使陳無宇致少姜晉且怒其非卿也而執之矣則公之弔少姜雖曰非禮當亦晉平之所喜者肯以為非伉儷也而辭之乎且繼此辭公者四其為拒公而非尊公也審矣意當時季孫專魯其取卞也襄公歸自楚而不敢入矣今公如晉季孫恐其訴已故結晉卿而逆拒之耳然必以少姜為辭左氏所載乃晉之飾辭也似不得其實

三年春王正月丁未滕子原卒

夏叔弓如滕五月葬滕成公

杜註卿共小國之葬禮過厚葬襄公滕子來會故魯厚報之按昭公謹于交隣之禮故以知禮稱

秋小邾子來朝

八月大雩

冬大雨雹

北燕伯欵出奔齊

諸侯出奔不名此名者從此遂失國也與諸侯卒則

名義同

四年春王正月大雨雹

胡氏安國曰雹戾氣也陰脅陽臣脅君之象申豐者
季氏之享也不肯端言其事故暴揚于朝歸咎歲冰
之失夫歲冰特調燮之一事耳謂能使四時無愆伏
凄苦之變雷出不震無菑霜雹則亦誣矣

夏楚子蔡侯陳侯鄭伯許男徐子滕子頃子胡子沈子
小邾子宋世子佐淮夷會于申

楚子使椒舉如晉求諸侯晉侯許之夏諸侯如楚惟魯衛曹邾不會六月丙子楚子合諸侯于申胡氏安國曰申之會楚子為主而不殊淮夷是在會之諸侯皆狄也其說非是按春秋于吳多殊會成十五年會吳于鍾離襄十年會吳于柤于向皆以吳先在是而晉帥諸侯往會之故不得不會而又會若襄五年秋諸侯會于戚吳人入聽命則不書會吳于戚矣淮夷與于申之會非先在申而楚帥諸侯以會之也豈有

殊會之理乃遂以為遍刺天下之諸侯適見其鑿而不可通矣

楚人執徐子

徐子吳出也以為貳焉故執之按孟之會執宋公不覆舉楚人此獨覆舉者其說詳彼條下先儒或謂若不覆舉楚人不知執之者為誰矣其說非是楚主會而執徐子豈不知執之者為誰乎如僖十五年書晉侯及秦伯戰于韓獲晉侯亦不覆舉秦人也此自是

兩事故覆舉耳別為之說要不可通

秋七月楚子蔡侯陳侯許男頓子胡子沈子淮夷伐吳
杜註因申會以伐吳不言諸侯者鄭齊滕小邾宋不
在列故也

執齊慶封殺之

按執齊慶封不書楚人者克朱方而執其邑大夫與
伐吳一事也故不覆舉楚人上文執徐子則會不與
執為類兩事也故必覆舉其不曰殺齊慶封而曰執

齊慶封殺之者楚與吳為仇初無意于殺齊慶封也
克朱方而執之因欲徇于諸侯以為名蓋慶封被執
之後而楚始有殺之之意若不書執而但書曰殺齊
慶封則其語勢直而急似楚真為討齊慶封而伐吳
矣傳稱圍朱方克之而經不書者克而不有其地書
執齊慶封足以槩之故

遂滅賴

九月取鄆

不書伐莒者傳稱鄆叛而來本未嘗以兵取之也

冬十有二月乙卯叔孫豹卒

五年春王正月舍中軍

傳初作中軍三分公室而各有其一季孫盡征之叔孫氏臣其子弟孟氏取其半焉及其舍之也四分公室季氏擇其二二子各一皆盡征之而貢于公按初作云作三軍今不云舍三軍者初作時舊有二軍非于二軍外更增一軍也乃令舊皆屬公者今以五分

屬公七分屬私屬私者為上下二軍屬公者為中軍
是增一軍而二軍皆動故云作三軍此則惟舍中軍
之衆屬上下二軍而已其上下二軍如故也故惟云
舍中軍作三軍者卑公室之漸舍中軍者卑公室之
極

楚殺其大夫屈申

傳楚子以屈申為貳于吳乃殺之

公如晉

汪氏克寬曰昭公如晉者七至晉而見止者一及河而不至者五惟此年得善往返然以莒人之愬亦幾不免于辱

夏莒牟夷以牟婁及防茲來奔

傳牟夷非鄉而書尊地也辨見襄二十一年邾庶其以漆間丘來奔下防茲言及者公羊傳不以私邑累公邑也

秋七月公至自晉

傳莒人愬于晉晉侯欲止公范獻子不可請歸之而
以師討焉乃歸公

戊辰叔弓帥師敗莒師于蚡泉

傳莒人來討不設備戊辰叔弓帥師敗諸蚡泉莒未
陳也

秦伯卒

冬楚子蔡侯陳侯許男頓子沈子徐人越人伐吳

報棘櫟麻之役也越始見經稱人者與諸國列序而

獨以號舉于文不順故稱人傳稱吳人敗之于鵲岸
不書者不告也

六年春王正月杞伯益姑卒

傳弔如同盟禮也杜註魯怨杞因晉取其田而今不
廢喪紀故禮之

葬秦景公

夏季孫宿如晉

傳拜莒田也杜註謝前年受牟夷邑不見討

葬杞文公

宋華合比出奔衛

傳宋寺人柳有寵太子佐惡之華合比曰我殺之柳聞之坎用牲埋書而告公曰合比將納亡人之族既盟于北郭矣公使視之有馬遂逐合比按襄二十六年寺人惠牆伊戾讒太子痤亦坎牲加書而告公曰與楚客盟矣與此事相類毛氏奇齡曰猶是宋平一人前既識太子之冤已烹寺人而今復受其譖猶是

太子佐前不能救兄今復不能為合比辨此皆事之不足據者解經者不可不察也

秋九月大雩

楚蘧罷帥師伐吳

傳楚子使蘧洩伐徐吳人救之令尹子蕩帥師伐吳師于豫章而次于乾谿吳人敗其師于房鍾杜註楚不以敗告故不書按下叔弓如楚傳稱弔敗則非不告矣蓋春秋于勝負無闕于大勢者畧而不載其常

也

冬叔弓如楚

弔敗也

齊侯伐北燕

傳齊侯伐北燕納簡公燕人行成戊午盟于濡上燕人歸燕姬賂以瑤璽玉櫝竿耳不克而還按傳稱納簡公而經不書者得賂而還不成乎納也

七年春王正月暨齊平

按傳文十六年稱及齊平襄二十年稱及莒平哀八年稱及齊平而經皆不書獨此年書暨齊平定十年書及齊平十一年書及鄭平先儒或以文十六年書行父會齊侯于穀襄二十年書會莒人盟于向哀八年書齊人歸讙及闡則其平可知故從省文不書平其說非也定十年下書公會齊侯于夾谷上仍書及齊平何不從省文也蓋凡彼為我所侵伐而有怨于我者與之平則書若我為彼所侵伐而有怨于彼者

與之平則不書考傳文十六年齊商人無道既執子
叔姬又伐我西鄙晉不能救故公與之平襄二十年
以督揚之盟與莒平哀八年以齊討入邾而與之平
或以勢不能抗或迫于大國之命雖與之平而非其
心之所願故其平不書者魯史之舊文以非其心之
所願而諱之也魯史之所無聖人安得而益之正月
暨齊平三月叔孫婁如齊蒞盟與定十一年及鄭平
叔還如鄭蒞盟事正相類其為魯暨齊平無疑且外

諸侯相與平非有關於天下之大勢者春秋不書左氏謂齊求燕而與之平其說不足信變及言暨者穀梁傳不得已曰暨齊強而魯弱魯不應能強齊所為不得已者殆卑詞厚幣以請成在外曰輸在內曰暨而為所強者亦遂有不得已而從其請者歟是時季氏不臣之迹已著四分公室而擇取其二故公欲結大國之援將藉之以除其偏而晉政多門既不能預知魯國之難吳楚又鞭長莫及惟齊與魯壤地相接

景公方有圖伯之志故公強齊而與之平以冀其緩
急之相濟也春秋書之曰暨明其汲汲然于此一平
非徒敦隣國之好而已二十五年公伐季氏不克而
孫于齊其端已兆于此矣

三月公如楚

傳楚子成章華之臺願與諸侯落之遂啟疆來召公

三月公如楚

叔孫舍如齊蒞盟

始暨齊平故盟以結好

夏四月甲辰朔日有食之

秋八月戊辰衛侯惡卒

九月公至自楚

冬十有一月癸未季孫宿卒

十有二月癸亥葬衛襄公

八年春陳侯之弟招殺陳世子偃師

傳陳哀公元妃鄭姬生悼太子偃師二妃生公子留

三妃生公子勝二妃嬖留有寵屬諸司徒招與公子過哀公有廢疾三月甲申公子招公子過殺世子偃師而立公子留哀公縊按招為司徒故元年招稱公子此變文以陳侯之弟書者著其以親屬而忍為大

惡也

本望溪先生說

夏四月辛丑陳侯溺卒

叔弓如晉

楚人執陳行人干徵師殺之

傳干徵師赴于楚且告有立君公子勝慙之于楚楚人執而殺之按稱行人者先儒謂事由招過非徵師之罪故書曰行人其說非也詳見莊十七年齊人執鄭詹下

陳公子留出奔鄭

稱公子不予招之立為世子也

秋蒐于紅

不言公先儒以為權在三家望溪先生曰書公者公

之私行也不書公者國政也但書蒐者選徒約也曰大者境內畢作也按春秋五書蒐皆在昭定之世豈前此皆不蒐耶蓋蒐狩必在近郊之地得其地則不書昭定之世三桓擅國四分公室各有分地往往就其私邑所近之處以閱其軍實故于紅于昌間于比蒲皆惟三家之所便而不主故常聖人詳書于冊蓋以蒐非其地而譏之也昭定以前豈有是哉然亦有得其地而書如桓六年書大閱者則以非時簡車徒

為戰于郎之張本也

陳人殺其大夫公子過

傳公子招歸罪于公子過而殺之是時陳無君故不稱國殺而兩下相殺不志于春秋招專陳國故稱人而不目招

大雩

冬十月壬午楚師滅陳執陳公子招放之于越殺陳孔魚

傳楚公子棄疾帥師奉孫吳圍陳冬十一月滅陳按
不目棄疾者放招殺魚非棄疾所得專也若滅陳目
棄疾而放招殺魚更舉楚子或更稱楚人則于文贅
孔魚公子招之黨係之陳者楚殺之也不曰陳大夫
者殺隣國之大夫與執隣國之大夫同例不書其官
葬陳哀公

按陳已滅而哀公書葬先儒以為存陳非也凡春秋
書外諸侯之葬皆據魯為文非據彼國為文也若據

彼國為文則當書曰某國葬某公矣惟據魯為文故魯不遣使往會輒不書葬而其文曰葬某國某公言魯遣使往葬某國某公也卿往則書某人如某國葬某國某公微者往則不書某人如某國第書葬某國某公不言會葬者禮重往葬義不係乎會也陳哀公之所以書葬者蓋溺卒即赴魯即遣使往會其葬及楚滅陳葬哀公時魯使在列故仍以葬陳哀公書蓋據魯為文非據陳國為文此哀公之所以國既滅而

書葬也或又以葬哀公者楚據其實而書之承上楚師滅陳文從省則其說更不足信春秋凡一國接書兩事必覆書某國從無承上文從省之例

九年春叔弓會楚子于陳

傳叔弓宋華亥鄭游吉衛趙厲會楚子于陳杜註楚子在陳四國大夫往不行會禮故不總書愚按經書會未有不行會禮者四國離至不旅見故不總書

許遷于夷

杜註許畏鄭欲遷故以自遷為文

夏四月陳災

陳已滅而書陳災者災害必繫于所災所害之處書
陳災指其處也

秋仲孫貜如齊

傳孟僖子如齊殷聘杜註自叔老聘齊今二十年禮
意久曠今復盛聘無忘舊好也

冬築郎囿

傳書時也

十年春王正月

夏齊樂施來奔

傳齊樂高氏皆嗜酒信內強于陳鮑氏而惡之陳鮑方睦遂伐樂高氏戰于稷樂高敗樂施高彊來奔杜註高彊不書非卿

秋七月李孫意如叔弓仲孫纘帥師伐莒

中軍既毀則仍二軍矣此三卿並書非必一卿領一

軍也殆季孫自將一軍其一軍以正佐分領之歟叔
弓宣公弟叔盱之後非叔孫氏也胡氏以為三家誤
矣傳稱取郟而經不書者意如以此見執故諱之

戊子晉侯彪卒

九月叔孫舍如晉葬晉平公

十有二月甲子宋公成卒

不書冬缺文

十有一年春王二月叔弓如宋葬宋平公

夏四月丁巳楚子虔誘蔡侯般殺之于申

傳楚子在申召蔡靈侯蔡大夫曰幣重言甘誘我也
不如無往蔡侯不可楚子伏甲而饗蔡侯于申執而
殺之刑其士七十人按楚子虔何以名先儒謂惡其
誘殺非也楚子棄疾亦嘗誘戎蠻子而殺之矣何獨
于此而名之蓋楚靈弑君之事雖不可知而殺其君
之二子以篡其位則無可疑者是其罪與弑君等天
下惟無瑕者可以責人已則有罪而討人之罪君子

弗予也故諸侯不生名而于此獨名者著誘殺蔡侯
般者非他人乃楚子虔也他人挾詐而殄不義已不
得為伯討以楚子虔而誘殺蔡侯般則如同浴而譏
裸程尤不足以服其心矣故名之以別其人于凡討
罪者耳豈徒惡其誘殺云爾乎

楚公子棄疾帥師圍蔡

五月甲申夫人歸氏薨

左氏以齊歸為娣望溪先生曰非也未有誌娣之薨

而反削夫人之薨葬者也歷襄昭定哀而未嘗別見
襄夫人之薨以此知齊歸之為嫡也

大蒐于比蒲

有大喪而不廢蒐非禮也

仲孫矣會邾子盟于祿禚

秋季孫意如會晉韓起齊國弱宋華亥衛北宮佗鄭罕
虎曹人杞人于厥慙

傳謀救蔡也晉人使狐父請蔡于楚弗許

九月己亥葬我小君齊歸

冬十有一月丁酉楚師滅蔡執蔡世子有以歸用之

傳楚子滅蔡用隱太子于岡山申無宇曰不祥五牲
不相為用況諸侯乎按申無宇稱用諸侯則有已嗣
君位矣未踰年宜稱子而以世子書者禮國君薨既
殯五日嗣子于柩前即位國人稱子是時般見殺而
國被圍有並無柩前可以行禮故春秋不得以子稱
也邾人執鄫子用之不名而有名者既滅其國矣用

其世子不足以甚其罪也故有名

十有二年春齊高偃帥師納北燕伯于陽

陽非北燕之國都故不書復歸納于陽不應名衛侯
入于夷儀不名是其例也歟終于陽不得其卒而名
之故不得不名其出奔與莒庚與蔡朱名同義不曰
北燕伯入于陽而以齊納為文者以著齊景公之有
志于復伯也

三月壬申鄭伯嘉卒

夏宋公使華定來聘

通嗣君也

公如晉至河乃復

傳取鄭之役莒人懇于晉晉有平公之喪未之治也
故辭公公子慙遂如晉穀梁傳季孫氏不使遂乎晉
也按公如晉者七至河而復者五豈皆莒之懇耶穀
梁之說似得其實

五月葬鄭簡公

杜註三月而葬速

楚殺其大夫成熊

傳楚子謂成熊若敖之餘也遂殺之杜註宣四年關
椒作亂楚子信讒而托若敖之餘

秋七月

冬十月公子慙出奔齊

南蒯不禮于季平子與公子慙謀欲出季氏而歸其
室于公使慙更其位及慙從公如晉蒯懼不克以費

叛如齊慙還及郊聞費叛遂出奔

楚子伐徐

傳楚子狩于州來次于潁尾使蕩侯潘子帥師圍徐以懼吳楚子次于乾谿以為之援按圍徐者非楚子故書伐而不書圍

晉伐鮮虞

晉不稱師義見文十年秦伐晉下

十有三年春叔弓帥師圍費

按經書內園邑七皆不書叛成三年園棘拒命者非棘民則齊有司也定六年園鄆與齊人爭皆不可以叛言也昭二十六年園成時公已孫齊舉國拒命不得獨言成叛也定十二年園成欲書公歛處父叛則為孟氏守而非叛也欲書孟孫以成叛又非其事之實故第書園以紀其拒命而不目其人焉惟昭十三年園費則南蒯以費叛定十年再園邠則侯犯以邠叛而經不書先儒或謂魯至昭定之時中軍既毀尺

地一民皆歸三家使以叛書是為三家討賊也而舍
叛又無以屬辭故書圍以著陪臣據邑之實而不書
叛以寓三家竊國之誅晉趙鞅荀寅士吉射治兵相
攻未嘗叛君也而並書叛邯鄲稷據邑以叛趙氏則
不書即此義其說非也內三叛與邯鄲稷之所以不
書者皆以家臣賤姓名不登于史冊故雖叛不書耳
若以嫌為三家討賊故不書則齊商人弑君之賊也
及其見弑也仍以弑其君書何不嫌為商人討賊乎

夏四月楚公子比自晉歸于楚弑其君虔于乾谿

傳楚遂氏之族及遂居許圍蔡洧蔓成然皆王所不
禮也因羣喪職之族啟越大夫常壽過作亂圍固城
克息舟城而居之觀起之死也其子從在蔡事朝吳
曰今不封蔡蔡不封矣我請試之以蔡公之命召子
干子皙及郊而告之情強與之盟入襲蔡蔡公將食
見之而逃觀從使子干食坎用牲加書而速行已殉
于蔡曰蔡公召二子將納之與之盟而遣之矣將師

而從之蔡人聚將執之辭曰失賊成軍而殺余何益
乃釋之朝吳曰二三子若能死亡則如違之以待所
濟若求安定則如與之以濟所欲且違上何適而可
衆曰與之乃奉蔡公名二子而盟于鄧依陳蔡人以
國楚公子比公子黑肱公子棄疾蔓成然蔡朝吳帥
陳蔡不羹許葉之師因四族之徒以入楚及郢蔡公
使須務牟與史捍先入因正僕人殺太子祿及公子
罷敵公子比為王公子黑肱為令尹次于魚陂公子

棄疾為司馬先除王宮使觀從從師于乾谿而告之
且曰先歸復所後者剽師及訾梁而潰王沿夏將欲
入鄢茅尹無字之子申亥求王遇諸棘園以歸夏五
月癸亥王縊于茅尹申亥氏按公子返國嗣位例書
入此獨書歸者弑君之賊旋即見殺未嘗一日能自
定其位故春秋不成其為君也然大夫以惡亦曰入
下書弑君而不從以惡例者常其自晉歸楚之時並
無徒衆故也其必書地者乾谿師潰處自縊于茅尹

氏以其迹觀之比之罪疑與剗刃于其君者有間然
先歸令下弑械已成聖人本比欲死其君之心而加
之以惡名故必書虔所在之地以實之不使與剗刃
者殊科也春秋凡接書一人兩事必覆舉其人此書
弑其君不復書公子比者歸楚而弑其君弑不可與
歸對舉為兩事也此與僖二十八年晉侯入曹執曹
伯宣十一年楚子入陳納公孫寧儀行父于陳皆不
覆舉其義正同

楚公子棄疾殺公子比

傳觀從謂子干曰不殺棄疾雖得國猶受禍也子干曰余不忍也從曰人將忍子吾不忍侯也乃行國每夜駭曰王入矣乙卯夜棄疾使周走而呼曰王至矣國人大驚二子皆自殺丙辰棄疾即位按比弑君之賊也以齊無知衛州吁之文例之當從討賊之詞書曰楚人殺公子比若以比為王棄疾為司馬比固棄疾之君也以齊商人之文例之又當書曰楚公子棄

疾弑其君比乃止以兩下相殺為文者蓋乾谿之禍
棄疾之罪更浮于比其以計殺之者圖自立耳故不
可從討賊之詞而又不以弑其君比書者同謀作亂
之人比又未嘗一日能自定其位不成乎其為君臣
也然則前弑虔何以獨書公子比傳稱蔡公將食見
之而逃則觀從之召二子棄疾實不與謀可知矣蓋
非棄疾從亂則比之逆謀不遂非比啟釁則棄疾之
逆謀不生比雖不能自定其位而推原禍始安得不

歸獄于比哉

秋公會劉子晉侯齊侯宋公衛侯鄭伯曹伯莒子邾子
滕子薛伯杞伯小邾子于平丘

傳晉成虎祁諸侯朝而歸者皆有二心叔向曰諸侯
不可以不示威乃並徵會遂合諸侯于平丘邾人莒
人愬于晉曰魯朝夕伐我幾亡矣晉侯不見公甲戌
同盟于平丘公不與盟按成十六年沙隨之會書不
見公此書公不與盟則公猶與會但不與盟耳左氏

晉侯不見公之說恐不確

八月甲戌同盟于平丘

覆舉平丘者會盟不同日也書同盟者有王臣同歆
晉不敢以主盟自居故

公不與盟

公不與盟不諱者耻輕于見執

晉人執季孫意如以歸

望溪先生曰春秋時國事之慎未有甚于魯者三桓

之在國重于君而諸侯視之亦重于君平丘之盟公
不與而執意如非恕公也謂止公不若止季孫為魯
所急也

公至自會

蔡侯廬歸于蔡陳侯吳歸于陳

楚公子干公子皙之歸楚也依陳蔡人以國及平王
即位封陳蔡隱太子之子廬歸于蔡悼太子之子吳
歸于陳按太子之子也而稱蔡侯陳侯正其名不與

楚人專封也公子返國則書入此諸侯也故不曰入而曰歸諸侯返國則書復歸陳蔡中并于楚國本非其所有也故不曰復不書自楚者諸侯返國之常文冬十月葬蔡靈公

國復乃葬凡三十有一月矣

公如晉至河乃復

傳公如晉荀吳謂韓宣子曰諸侯相朝講舊好也執其卿而朝其君有不好焉不如辭之乃使士景伯辭

公于河

吳滅州來

王氏葆曰州來近楚小國楚嘗取以為附庸故書滅而不係國按傳稱吳滅州來令尹子旗請伐吳王弗許且有州來在吳猶在楚之言據此則州來之于楚當不過名相役屬耳其田土貢賦之所入州來自有之本不全以供楚故雖為吳所滅而于楚亦無大損此可為近楚小國之確証

十有四年春意如至自晉

傳季孫猶在晉子服惠伯私于中行穆子曰魯事晉
何如夷之小國土地猶大所命能具若為夷棄之使
事齊楚其何瘳乎晉乃歸季孫不書季孫者承上省
文大夫不致必見執而後致

三月曹伯滕卒

夏四月

秋葬曹武公

八月莒子去疾卒

莒子卒而不書葬魯不會也昭公號知禮雖薛杞小國無不會其葬者而獨于莒之葬不會胡氏謂季氏故理或然也

冬莒殺其公子意恢

傳莒著丘公卒郊公不感國人弗順欲立著丘公之弟庚與蒲餘侯惡公子意恢而善于庚與郊公惡公子鐸而善于意恢公子鐸因與蒲餘侯謀曰爾殺意

恢我出君而納庚與許之冬十二月蒲餘侯夫茲殺
公子意恢按殺意恢者蒲餘侯也何以稱國殺蓋兩
下相殺不志于春秋故不可目蒲餘侯殺也而殺大
夫而稱人者如陳人之殺公子禦寇宋人之殺其大
夫司馬晉人之殺三大夫陳人之殺公子過非羣下
之作亂即執政大臣之擅權故皆書曰人以著其生
殺之柄之不自其君出也若晉欒書中行偃之殺胥
童則以其為厲公之所嬖也故欲弑厲公而先殺胥

童莒蒲餘侯之殺意恢亦以其為郊公之所善也故
欲逐郊公而先殺意恢厲與郊且不能自免又豈特
生殺之柄之不自其君出而已故稱國殺以見其國
亂已甚必將有弑逆迫逐之禍隨其後也凡此皆隨
事立文其義固各有所當歟郊公出奔不書者去疾
卒而魯不會葬故郊公出奔庚與入立皆不以告不
告故不書杜註微之非也去疾之入展與之奔見于
經者屢矣何獨于郊公而微之不書大夫者公羊所

謂莒無大夫也

十有五年春王正月吳子夷末卒

二月癸酉有事于武宮籥入叔弓卒去樂卒事

傳禘于武宮叔弓蒞事籥入而卒去樂卒事禮也按
有事乃時祭非禘也不著祭名者為叔弓卒起故畧
之武宮魯武公廟復立于成六年

夏蔡朝吳出奔鄭

朝吳事楚而係之蔡者以其忠于蔡也

六月丁巳朔日有食之

秋晉荀吳帥師伐鮮虞

傳荀吳帥師伐鮮虞圍鼓鼓人告食盡力竭而後取之克鼓而還不戮一人以鼓子戴鞮歸按滅鼓不書者不告也稱荀吳帥師胡氏謂以正兵相加而不納其叛臣故稱名氏非也自宣成以後君將稱君大夫將稱名舊史之文云爾

冬公如晉

傳平丘之會故也杜註平丘之會公不與盟季孫見
執今既得免故往謝之

春秋究遺卷十三

欽定四庫全書

春秋究遺卷十四

左庶子葉酉撰

昭公下

十有六年

傳公在晉晉人止公不書諱之也按晉前以取鄭既不使公與盟今往謝而復執之晉之無禮甚矣而春秋諱之益知胡氏自反而縮之說迂而不可通

春齊侯伐徐

傳齊師至于蒲隧徐子行成賂以甲父之鼎

楚子誘戎蠻子殺之

傳楚子聞蠻氏之亂也使然丹誘戎蠻子殺之遂取蠻氏既而復立其子焉按戕隣國之君稱人僖十九年邾人執鄫子用之是其例矣此獨以楚子書者挾詐以殺人其陰險尤為聖心之所惡惡其詐自不得不目其人也戎蠻子不名與鄫子不名同義

夏公至自晉

秋八月己亥晉侯夷卒

九月大雩

季孫意如如晉冬十月葬晉昭公

卿供葬事文襄之制

十有七年春小邾子來朝

夏六月甲戌朔日有食之

傳六月甲戌朔日有食之祝史請所用幣平子禦之

曰止也惟正月朔伐鼓用幣太史曰在此月也杜註
正月謂建巳正陽之月于周為六月于夏為四月

秋郟子來朝

八月晉荀吳帥師滅陸渾之戎

傳荀吳帥師涉自棘津使祭史先用牲于雒陸渾人
弗知師從之遂滅陸渾數之以其貳于楚也陸渾子
奔楚

冬有星孛于大辰

楚人及吳戰于長岸

楚先勝而後敗勝負敵故不書楚稱人者說詳隱二
年莒人入向下吳常敗楚于鵠岸于房鍾皆不書而
楚伐吳屢見于經蓋吳猶不足以敵楚也至是則國
勢匹敵而抗兵相加矣故書戰自此始長岸楚地兩
國皆僭王故仍以楚主兵

十有八年春王三月曹伯須卒

夏五月壬午宋衛陳鄭災

杜註來告故書天火曰災按傳稱許不弔災君子知其先亡則魯必皆遣使往弔審矣不書者其人微也

六月邾人入郕

傳邾人襲郕遂入之盡俘以歸郕子曰余無歸矣從帑于邾邾人反郕夫人而舍其女

秋葬曹平公

冬許遷于白羽

杜註自葉遷也正義九年許遷于夷十年楚靈王遷

許胡沈道房申于荆平王即位皆復之許又歸于葉
故知此年是自葉遷也楚以其偏于鄭遷之所以存
許也故以自遷為文

十有九年春宋公伐邾

傳邾夫人宋向戌之女也故向寧請師二月宋公伐
邾圍蟲三月取之乃盡歸邾俘杜註不書圍取不以
告也按宋伐邾而盡歸邾俘義舉也取邑則似貪其
土地矣故諱之而不以告其不書歸邾俘者書伐邾

足以概之故

夏五月戊辰許世子止弑其君買

傳許悼公瘞飲太子止之藥而卒按傳稱飲太子止之藥而卒則止並非不嘗藥而已穀梁傳恐不足據蓋止乃雜學喜事之人平日自詭能醫適遇父疾一藥而殂雖無弑逆之意而律載和御藥誤不如法者死則止雖欲辭此惡名而不可得矣

己卯地震

秋齊高發帥師伐莒

杜註莒不事齊故

冬葬許悼公

許悼公書葬義見襄三十年葬蔡景公下

二十年春王正月

夏曹公孫會自鄆出奔宋

按奔未有言所自者此云自鄆正義云與二十二年
宋華亥向寧華定自宋南里出奔楚其文正同彼華

亥等入南里以叛又從南里出奔則此亦應爾叛不告故不書而胡傳引劉敞之說以為待放二說未知孰是然公子之子稱公孫據事直書並無賢之之意鄴邑名與宋南里在宋國都內不同故不係曹

秋盜殺衛侯之兄縶

衛公孟縶奪齊豹之邑又惡北宮喜褚師圃欲去之公子朝通于襄夫人而懼故齊豹北宮喜褚師圃公子朝作亂丙辰衛侯在平壽公孟有事于蓋獲之門

外齊子氏帷于門而伏甲焉遂殺公孟按殺繫書盜者蓋凡私有仇于其人並不假君命而殺之者則書曰盜不問其為大夫為士也義見襄十年盜殺鄭公子駢下左氏求名而不得之說固非胡氏以為蔽罪宗魯亦無此理齊豹首謀宗魯與聞其事雖不為無罪然既以身死之矣乃舍豹而責魯恐聖人之斷此獄不如是之頗也稱衛侯之兄無職司也亦無責衛侯意

冬十月宋華亥向寧華定出奔陳

宋元公惡華向華定華亥與向寧謀曰亡愈于死先諸遂殺羣公子劫公取太子樂與母弟辰公子地以為質公亦取華向之子以為質冬十月公殺華向之質而攻之華向奔陳

十有一月辛卯蔡侯廬卒

二十有一年春王三月葬蔡平公

夏晉侯使士鞅來聘

晉頃公即位通嗣君也

宋華亥向寧華定自陳入于宋南里以叛

宋司馬華費遂生華軀華多僚華登多僚與軀相惡
譖諸公曰將納亡人公懼使告司馬乃與公謀逐華
軀華軀將見司馬而行則遇多僚御司馬而朝其臣
張句遂與華軀殺多僚劫司馬以叛而召亡人壬寅
華向入居廬門以南里叛六月庚午宋城舊鄘及桑
林之門而守之按南里係宋者以其為宋國城內之

里名也

秋七月壬午朔日有食之

八月乙亥叔輒卒

冬蔡侯朱出奔楚

傳楚費無極取貨于東國而謂蔡人曰朱不用命于
楚君王將立東國若不先從王欲楚必圍蔡蔡人懼
出朱而立東國杜註東國隱太子之子平侯廬之弟
朱叔父也

公如晉至河乃復

傳公如晉及河鼓叛晉將伐鮮虞故辭公按鼓叛何妨于邦交蓋晉之權家黨季氏而恐公之訴其罪也故假以是為辭而却公耳

二十有二年春齊侯伐莒

傳齊北郭啟帥師伐莒莒子將戰苑羊牧之諫曰大國不可怒也不聽敗之于壽餘齊侯伐莒莒子行成莒于是大惡其君

宋華亥向寧華定自宋南里出奔楚

傳冬十月華登以吳師至救華氏齊烏枝鳴戍宋丙寅齊師宋師敗吳師于鴻口華登帥其餘以敗宋師十一月癸未公子城以晉師至曹翰胡會晉荀吳齊苑何忌衛公子朝救宋大敗華氏圍諸南里二十二年二月華登如楚乞師楚遂越帥師將逆華氏使告于宋曰寡君聞君有不令之臣請受而戮之諸侯之戍謀曰若華氏知困而致死楚恥無功而疾戰非吾

利也不如出之以為楚功其亦無能為也已巳巳宋
華亥向寧華定出奔楚按書自宋南里別自國出奔
也

大蒐于昌間

書昌間非其地也

夏四月乙丑天王崩

六月叔鞅如京師葬景王王室亂

王子朝有寵于景王王欲立之夏四月乙丑王崩丁

已葬景王子朝因舊官百工之喪職秩者與靈景之族以作亂按不曰京師亂而云王室亂者言京師則通于上下言王室則其父子兄弟自亂之耳

劉子單子以王猛居于皇

子朝亂劉子奔揚單子奔平時羣王子追之單子殺之子朝奔京伐之奔山劉子入于王城單子欲告急于晉以王如平時遂如圓車次于皇以者王猛弱不能自立必賴二子左右之也王猛在喪不可稱天王

稱王子又與他王子相亂故以猛繫之于王王者諸侯目王國之辭乃王人之王非天王之王猶詩有王風不可謂之周也苟既正其為天王之王則後不得復稱子矣

秋劉子單子以王猛入于王城

按傳稱晉荀躒帥九州之戎及焦瑕溫原之師納王于王城經乃不書晉納而書劉單以者子朝奔京劉子入于王城單子使王子處守之則王之入王城實

二子以之晉不過以師從王入耳故不書晉納公羊
傳云入者篡辭非也入者自外而內之辭若以為篡
下經天王入于成周何說乎

冬十月王子猛卒

前稱王猛卒乃稱王子猛者生以名繫王不使與他
王子相亂卒稱王子正其為未踰年之子也王謂王
國與前同稱子故不曰崩而曰卒

十有二月癸酉朔日有食之

二十有三年春王正月叔孫舍如晉

傳邾人城翼還自雒姑武城人塞其前遂取邾師邾人愬于晉晉人來討叔孫婍如晉晉人執之

癸丑叔鞅卒

晉人執我行人叔孫舍

上書叔孫舍如晉其為行人明矣春秋只據實而書非有心以著其無罪也說見莊十七年齊人執鄭詹下

晉人圍郊

傳晉籍談荀躒賈辛司馬督師師次于社王師次于
任人辛丑伐京毀其西南二十三年正月壬寅二師
圍郊癸卯郊潯潰杜註二師王師晉師也王師不書
不以告按凡圍必久而不解者然後書郊明日即潰
而書圍者邑不言伐非圍無以屬辭也

夏六月蔡侯東國卒于楚

秋七月莒子庚與來奔

傳莒子庚與好劍苟鑄劍必試諸人國人患之又將
叛齊烏存帥國人以逐之遂來奔齊人納郊公按郊
公出奔不書而庚與書者以其來奔故諸侯奔不名
此名者從此遂失國也

戊辰吳敗頓胡沈蔡陳許之師于雞父胡子髡沈子逞
滅獲陳夏齧

傳吳伐州來楚遂越帥師及諸侯之師救州來吳人
禦諸鍾離子瑕卒楚師燾戊辰晦戰于雞父吳子以

罪人三千先犯胡沈與陳三國爭之吳為三軍以繫
于後吳之罪人或奔或止三國亂吳師擊之三國敗
獲胡沈之君及陳大夫舍胡沈之囚使奔許與蔡瑁
曰吾君死矣師譟而從之三國奔楚師大奔按不書
楚者楚師未與吳接也君戰死曰滅生得曰獲韓戰
稱獲晉侯大棘戰稱獲宋華元不嫌君臣同辭公羊
傳大夫生死皆曰獲無以見陳夏齧之必為死也胡
沈之君經書滅而傳稱獲者見獲而死也書其敗不

以國分以君大夫為序觀此則春秋序戰必不以大夫先諸侯也蓋信

天王居于狄泉

傳六月壬午王子朝入于尹庚寅單子劉子以王如
劉甲午王子朝入于王城杜註于是敬王居狄泉按
居狄泉入成周皆單劉以之而不書以何也望溪先
生曰王猛時尚未知誰為當立者以出入者獨單劉
耳敬王之立則晉人問于介衆而辭子朝名義顯然

歸心者不獨單劉矣此所以不書二子以也不書出者傳稱王子猛卒敬王即位館于子旅氏蓋自子旅氏如劉又自劉而居于狄泉故不可言出也

尹氏立王子朝

立王子朝者尹圉也不稱名而稱氏胡氏謂著世卿之擅權亂國以為後戒其說非也稱名則無別于列國之大夫非所以尊天子矣稱子又與劉子單子同故不得已而稱氏亦因時有此稱詩云王謂尹氏是

也

八月乙未地震

冬公如晉至河有疾乃復

傳為叔孫故如晉及河有疾而復

二十有四年春王二月丙戌仲孫貜卒

叔孫舍至自晉

左穀皆無叔孫字殆公羊衍文

大夫不致此致者以見執故與意如書致義同

夏五月乙未朔日有食之

秋八月大雩

傳旱也

丁酉杞伯郁釐卒

冬吳滅巢

胡氏安國曰巢楚之附庸實邑之也書吳滅巢以著
入郢之漸

葬杞平公

二十有五年春叔孫舍如宋

傳季公若之姊為小邾夫人生宋元夫人生子以妻季平子昭子如宋聘且逆之

夏叔詣會晉趙鞅宋樂大心衛北宮喜鄭游吉曹人邾人滕人薛人小邾人于黃父

傳謀王室也按謀王室大事也諸侯莫至僅合大夫以謀之且納王又期在明年其亦異于桓文之盟首止以定太子誅叔帶以定襄王之舉矣

有鸛鵒來巢

傳書所無也

秋七月上辛大雩季辛又雩

書再雩旱甚也

九月己亥公孫于齊次于陽州齊侯唁公于野井

傳九月戊戌公伐季氏平子登臺而請待于沂上以
察罪弗許請囚于費弗許請以五乘亡弗許邠孫曰
必殺之公使邠孫逆孟懿子叔孫氏之司馬馮戾救
季氏帥徒以往陷西北隅以入公徒釋甲執冰而踞

孟氏使登西北隅以望季氏見叔孫氏之旌以告孟氏殺郕昭伯遂伐公徒公與臧孫如墓謀遂行己亥公孫于齊次于陽州齊侯將唁公于平陰公先至于野井齊侯唁公于野井按先儒以唁于野井罪齊侯之不急公非也公次于陽州方遣使請逆于齊齊侯即欲親唁公于平陰公不敢當其厚意故先行至野井而與齊侯相遇蓋平陰之去陽州近野井之去陽州遠而其去齊都也則平陰遠而野井近齊侯欲以

遠迎為恭故使有司待于平陰而不意公已先至野井也其言于近地豈齊侯之不急公哉然公欲藉之以復國則其勢實有所不能是時晉伯雖衰而威令猶行魯又素屈服于晉使晉誠見恤則季孫必且為所脅而欲公之入也不難若齊則非晉比其威令固不能行于季孫也即興大師以伐之亦難保其戰之必勝今齊侯言公野井既以不早至平陰為已罪且為取魯邑以安其居而不使流寓于他國其于公不

可謂不盡力矣乃公不知其力之僅能及此也第悅其甘言以為是必能憂人之憂者于是入陵盟後如齊者再瀆請不已卒至宰夫主獻宴比大夫乃知齊之不足恃而轉而如晉焉春秋詳書于策蓋病公之輕慮淺謀不揣情度勢而漫為此無益之求也至晉之所以待公者則不逮齊遠甚當請逆時既有即安甥舅之誚及公復于竟亦第逆著乾侯而不容公至其國都以與晉侯相見迨二十九年公又自鄆如晉

仍不得與晉侯見而次于乾侯蓋晉之強家與季孫同惡相濟惟恐公之見晉侯而訴其罪也故逆以拒之此即公在國時五如晉皆辭公于河之故智也其後晉定新立毅然欲以師納公又沮于范鞅之邪謀以逐君之賊竟任其無咎而召之使來以脫其罪何以教天下之為人臣者乎故春秋兩書公如晉次于乾侯即繼之曰季孫意如會晉荀躒于適厯比事屬辭而聖人之情可見矣

冬十月戊辰叔孫舍卒

昭子從公于齊歸將安衆而納公平子有異志昭子使祝宗祈死戊辰卒按祈死之說不足信此年春媯聘宋與宋公對語而泣樂祈已知其將死何待于祈哉

十有一月己亥宋公佐卒于曲棘

宋元公為公故如晉道卒故書地

十有二月齊侯取鄆

凡外取內邑不書諱之也此不諱者取之以居公故
二十有六年春王正月葬宋元公

是年正月不書公在者以齊侯唁公野井之後即愖
公入其國都也正月在齊例不應書

三月公至自齊居于鄆

公未返國都而書至者賈氏達謂季氏示欲為臣故
以告廟非也諸侯去國必載主柩以行此昭公自告
廟耳豈有季氏在國而代公告至鄆之理鄭伯突入

于櫟衛侯入于夷儀皆書入此不書入而書居者若
適他國而返居于是者然為內諱也此時公在齊都
故書至自齊

夏公圍成

齊侯使公子鉏帥師從公圍成不書以齊師者蓋著
齊師之不足以而病公之不量力而輕為此舉也不
致者無功而還不以告廟故

秋公會齊侯莒子邾子杞伯盟于鄆陵

謀納公也莒邾杞皆魯之與國

公至自會居于鄆

九月庚申楚子居卒

冬十月天王入于成周

吳氏澂曰王城為東都以鎬京為周之西都東對西而言也成周為下都以王城為洛之上都下對上而言也時子朝據王城故王入于成周而居左氏序事以王入成周在子朝奔後合依經正之胡氏安國曰

因狄泉故稱入

尹氏召伯毛伯以王子朝奔楚

杜註召伯當言召氏經誤也尹召族奔非一人故言
氏正義傳言召伯盈逐王子朝朝及召氏之族奔楚
則召氏族出奔召伯身不奔也按經稱尹氏義見尹
氏立王子朝下不必以族奔也以族奔稱氏則立王
子朝豈亦以族立乎尹稱氏召伯毛伯稱行次尹首
惡召與毛特從之者耳然亦不得以子稱矣召伯經

書奔傳稱召伯盈逐王子朝傳聞異辭聖人必確見
所據杜氏信傳而欲改經誤甚

二十有七年春公如齊公至自齊居于鄆

是年傳稱孟懿子陽虎伐鄆公徒敗于且知而經不
書者伐鄆之罪無加于逐君故于內敗而諱之從恒
例也

夏四月吳弑其君僚

傳吳子欲因楚喪而伐之使公子掩餘公子燭庸帥

師園潛使延州來季子聘于上國吳公子光曰此時
也不可失也夏四月光伏甲于窟室而享王鱄設諸
置劍于魚中以進抽劍刺王遂弑王按春秋弑君而
稱國者四莒庶其晉州蒲吳僚薛比其義各異惟吳
僚薛比則望溪先生所謂懸獄而不敢有所歸其說
是也薛比事無可考吳僚見弑于公子光而操刃者
則鱄設諸也其赴告之文不曰鱄設諸必曰國亂而
無主名可知矣春秋之例國亂而無主名稱人微者

弒亦稱人。鱗設諸賤名氏不合登史冊例。應以人書而經則稱國。以弒者聖人之慎也。蓋春秋至襄昭以後皆聖人所見之世。而事非本國。仍多傳聞傳聞之詞。久然後定。若正當所見之世。一事也。而言人人殊。是非混淆。公論未出。于是或以諱惡而故為掩飾者。有之。或以愛憎而各持異同者。有之。此固聖人所無。可如何者。吳雖與魯通。而僻處東南。事難徵信。僚之見弒。聖人亦知赴告之不實也。欲從告書。人既不可。

而欲徑書吳公子光弑其君又有萬一失入之慮故
懸獄而不敢有所歸第書其國有是事而不少濫一
辭焉此所為聖人之慎也胡氏乃謂歸罪于其大臣
鑿矣或曰吳以號舉不書吳人從其恒稱也其說亦
通

楚殺其大夫郤宛

楚令尹子常賄而信讒費無極讒郤宛遂攻郤氏且
蕪之郤宛自殺盡殺郤氏之族黨

秋晉士鞅宋樂祁犁衛北宮喜曹人邾人滕人會于扈
傳會于扈且謀納公也宋衛皆利納公范獻子取貨
于季孫謂司城子梁與北宮貞子曰季孫未知其罪
而君伐之請囚請亡于是乎弗獲君又弗克而自出
也夫豈無脩而能出君乎故鞅以為難乃辭小國而
以難復按傳稱公使子家如晉在此盟後恐當在此
盟前使非子家請之晉不應無故而謀納公也

冬十月曹伯午卒

邾快來奔

徐氏邈曰自此以前邾畀我庶其並來奔今邾快又至邾魯隣國而為逋逃主為過之甚故悲書之

公如齊公至自齊居于鄆

傳冬公如齊齊侯請饗之子家子曰朝夕立于其朝又何饗焉其飲酒也乃飲酒使宰獻而請安杜註比公于大夫也禮宴大夫使宰為主獻獻爵也請安齊侯請自安不在坐也劉炫引燕禮謂請賓自安以規

杜正義謂齊侯與公敵體安賓乃其常事何須傳載
其文以為卑公之義明是齊侯請欲自安不在其坐
按請安謂請自安于文不順劉氏說似較長蓋與上
宰獻連文請安者宰請公安也正足明慢公之甚正
義駁之悞矣

二十有八年春王三月葬曹悼公

公如晉次于乾侯

傳公如晉將如乾侯子家子曰有求于人而即其安

人孰矜之其造于境弗聽使請逆于晉晉人使公復
于境而逆之杜註逆著乾侯也言公不用子家子之
言所以見辱按此與次于陽州文法同而其事之情
實則異此蓋病晉之強家黨季孫以沮公而使之不
得至晉都也

夏四月丙戌鄭伯寧卒

六月葬鄭定公

秋七月癸巳滕子寧卒

冬葬滕悼公

二十有九年春公至自乾侯居于鄆齊侯使高張來唁公

二十六年書公至自齊而此不書公至自晉者以公未至晉都故齊侯使高張來唁公唁公至晉而不見受也

公如晉次于乾侯

傳齊侯使高張來唁公稱主君子家子曰齊卑君矣

君祇辱焉公如乾侯杜註為齊所辱故復適晉冀見
恤按傳稱公如乾侯而經必曰公如晉次于乾侯者
蓋著公之如晉其本意原欲至晉都而乾侯特其所
次止之地耳乃至明年正月而公仍在焉則晉之強
家黨季孫以沮公者其罪不待貶絕而自見矣又按
乾侯晉地而公如晉之初即不待于晉境而如乾侯
子家云有求于人而即其安人誰矜之不知乾侯何
以為公之所安也公于去年三月次于乾侯至今年

春巳一年矣乃甫至自乾侯居于鄆旋又如晉而次于乾侯其戀戀于乾侯者當必有故然不可考矣

夏四月庚子叔詣卒

秋七月

冬十月鄆潰

穀梁傳潰之為言上下不相得也上下不相得則惡矣昭公出奔民如釋重負按穀梁此說必有所本先儒或以季氏誘之使潰此刻論也蓋從公者皆小人

雖淹恤在外必依勢作威以一邑之小而責以公家
平日供億之浩繁是時公又在乾侯如子家輩皆隨
行其留在鄆者必以無所稟承而益肆于是鄆人不
勝其擾遂相率而去之此事勢之所必有者季氏逐
君其罪自莫可逭然若以此莫須有之罪加之反不
足以服其心矣

三十年春王正月公在乾侯

公正月在鄆不書者魯邑也乾侯晉邑非其所宜在

矣故書不曰居而曰在者亦以其為晉地故

夏六月庚辰晉侯去疾卒

秋八月葬晉頃公

冬十有二月吳滅徐徐子章羽奔楚

徐子名者世近紀載詳故

三十有一年春王正月公在乾侯季孫意如會晉荀躒
于適歷

傳晉侯將以師納公范獻子曰若召季孫而不來則

信不臣矣然後伐之晉侯召季孫獻子使私焉曰子
必來我受其無咎季孫意如會晉荀躒于適歷陸氏
淳曰逐君之臣晉不之罪而反與會據事直書而晉
之為盟主可見矣荀躒之為人臣可見矣此不待貶
絕而罪惡見者也

夏四月丁巳薛伯穀卒

晉侯使荀躒唁公于乾侯

傳季孫從知伯如乾侯子家子曰君與之歸一慙之

不忍而終身慙乎公曰諾衆曰在一言矣君必逐之
荀躒以晉侯之命唁公曰寡君使躒以君命討于意
如意如不敢逃死君其入也君曰君惠顧先君之好
施及亡人將使冀除宗祧以事君則不能見夫人所
能見夫人者有如河荀躒掩耳而走曰寡君其罪之
恐敢與知魯國之難

秋葬薛獻公

冬黑肱以濫來奔

杜註不書邾史缺文

十有二月辛亥朔日有食之

三十有二年春王正月公在乾侯取闕

按昭公之難叔孫如闕則其為魯邑明矣殆季氏自
晉返魯而以闕歸公欲自掩其逐君之罪猶歸馬及
衣屨之意云爾書取者不以其名予季氏也

夏吳伐越

傳始用師于越也

秋七月

冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周

王使富辛與石張如晉請城成周范獻子謂魏獻子曰與其戍周不如城之使伯音對曰天子有命敢不奉承冬十一月晉魏舒韓不信如京師合諸侯之大夫于狄泉尋盟且令城成周己丑士彌牟令役于諸侯屬役賦文書以授帥而效諸劉子韓簡子臨之以

為成命杜註臨履其事以命諸侯經所以不書魏舒
按此年傳稱冬十一月魏舒韓不信如京師合諸侯
之大夫于狄泉尋盟且令城成周魏子南面衛彪傒
曰魏子必有大咎于位以令大事非其任也云云定
公元年傳又稱春王正月辛巳晉魏舒合諸侯之大
夫子狄泉將以城成周魏子涖政衛彪傒曰將建天
子而易位以令非義也云云此一事也左氏兩載之
而失刪其一耳此年傳已丑士彌牟營成周云云定

元年傳云孟懿子會城成周庚寅裁庚寅即巳丑之
明日而傳分為兩年此役不過三旬而畢豈有去年
巳令役于諸侯遲之兩月而始裁者乎其為複出無
疑前載其事于冬十一月後載其事于春王正月周
之正月夏之十一月也其月同其為一事無疑

本顧氏炎

武說

十有二月巳未公薨于乾侯

傳書公薨于乾侯言失其所也

春秋究遺卷十四